

ՀԱՅԱՍՏԱՆԸ ԵՎ ՀԱՅԵՐԸ ԱՐԵՎԵԼՔԻ ԵՎ ԱՐԵՎՍՈՒՏՔԻ ՄԻՋԵՎ

Լևոն Աբրահամյան

Հողվածում դիտարկվում է Արևելքի և Արևմուտքի սահմանին հայերի հայտնվելու հետաքրքիր մի օրինաչափություն՝ անկախ նրանից, թե ուր է տեղաշարժվել այդ սահմանը պատմական տարբեր ժամանակաշրջաններում: Առաջարկվում է այս դժվարբացատրելի առանձնահատկությունն օգտագործել համակեցության նոր ռազմավարություններ մշակելու համար:

Եվրոպան և Ասիան՝ Եվրասիա մայրցամաքի բաղկացուցիչները, ոչ միայն սահմանակից, պայմանականորեն սահմանազատված աշխարհագրական տարածքներ են, այլև մշակութային ու քաղաքական առումներով հակադիր հասկացություններ: Քանի որ Եվրոպայի և Ասիայի միջև հստակ բնական սահման չկա¹, ապա այն սահմանագծում են տարբեր ձևերով: Այդ սահմանը գլխավորապես տատանվում է Կասպից և Սև ծովերի միջև ընկած շրջանում: Սովորաբար այն անցկացնում են Կովկասյան Մեծ լեռնաշղթայով կամ մի փոքր հյուսիս՝ Կումո-Մանիչի գետաբերանով: Այս պարագայում Հայաստանը, ամբողջ Անդրկովկասով հանդերձ, հայտնվում է Ասիայում: Երբեմն էլ Անդրկովկասը ներառում են Եվրոպայի մեջ², և Հայաստանը հայտնվում է այնտեղ:

Սակայն այլ բաժանումների համաձայն՝ Հայաստանը շարունակ հայտնվում է Եվրոպայում: Օրինակ, նրա ֆուտբոլի թիմը հանդես է գալիս եվրոպական թիմերի լիգայում, իսկ ինքը՝ Հայաստանը, Եվրոպայի խորհրդի անդամ է³, որտեղից նրան սպառնում են վտարել, եթե իրեն որպես եվրոպական երկիր չպահի: Դրսից նման «եվրոպական քաջալերանքը» ներսում հանդիպում է պատասխան ռեակցիայի. հայերն իրենց սովորաբար եվրոպացի են համարում: Թեև դա աշխարհագրական սահմանին մոտ բնակվող շատ, գուցե նույնիսկ բոլոր ժողովուրդների քաղաքակրթական ինքնագնահատականն է: Այսպես, Թուրքիան հավակնում է նույնիսկ մտնել Եվ-

¹ Եվրոպայի՝ հոմերոսյան հիմնում հիշատակվող նախնական սահմանների մասին տե՛ս [1]:

² Տե՛ս ն, օրինակ, «Եվրոպա» հոդվածը Մովսեսիկյան մեծ հանրագիտարանում [2, c. 383-384]:

³ Հմմտ. [3, c. 68]. Վրաստանում իրերի համանման դրույթյան մասին:

րամիություն: Ինչ վերաբերում է Վրաստանին, ապա այն դրսևորում է աչքի զարնող ավելի մեծ եվրոպակենտրոն հակում: Մանավանդ այն բանից հետո, երբ վերջերս այնտեղ հայտնաբերվեց եվրոպոիդի հնագույն գանգ, որը վրացիների կողմից հաճախ մեկնաբանվում է որպես «եվրոպացիների նախնի», վրացիներն սկսեցին իրենց եվրոպացի համարել նաև պալեոանթրոպոլոգիական առումով:

Այս նույն ժամանակ ժամանակակից Հայաստանը նիշաբանական (սեմիոտիկ) իմաստով ի ցույց է դնում իր մերձավորությունը Ասիային: Օրինակ, «արևմտյան» ազատ շուկան Երևանում (որ ներկայացված է մանր առևտրականների մակարդակով) առաջ եկավ որպես իսկական ասիական բազար, իսկ արևմտյան սպառողական ապրանքները սկզբում Հայաստան էին թափանցում (և մասամբ շարունակում են թափանցել) իրենց արևելյան կերպարանքով [4]: Հայաստանում երկյակ՝ եվրոպական և ասիական «քաղաքացիության» ֆենոմենի օրինակները կարելի է հեշտությամբ շարունակել¹, այնպես որ՝ շատ հատկանիշներով Հայաստանը ինչ-որ միջին օղակ է հանդիսանում Եվրոպայի և Ասիայի միջև՝ օժտված լինելով երկուսի հատկանիշներով:

Եվրոպայի և Ասիայի հակադրումը ենթադրում է ավելի հին և ընդհանուր՝ Արևմուտք-Արևելք հակադրություն: Այն անհամեմատ ավելի ընդհանուր բնույթի է և արտահայտում է, ընդհանուր առմամբ, մարդու, ընդ որում՝ բոլորովին էլ ոչ միայն աշխարհագրական, կողմնորոշումը իրեն շրջապատող աշխարհում: Ավելին, աշխարհի բաժանման բնույթն ու սահմաններն ըստ Արևելք-Արևմուտք սկզբունքի՝ պայմանավորված են հենց մարդով, նրա կողմից աշխարհի ակտիվ և ազդեցիկ յուրացմամբ: Ընդ որում, եթե Եվրոպայի և Ասիայի սահմանը կարող է փոքր-ինչ տեղաշարժվել այս կամ այն կողմ աշխարհագրագետների, քաղաքական գործիչների և սահմանամերձ տարածքների բնակիչների երևակայության մեջ, ապա Արևմուտքի և Արևելքի սահմանն անհամեմատ ճկուն է և շարժական: Բայց զարմանալին այն է, որ այդ սահմանի տեղաշարժերը կարծես թե առանց հայերի մասնակցության չեն անցնում:

Այսպես, սելջուկյան նվաճումների արդյունքում այս սահմանը տեղաշարժվեց դեպի արևմուտք, Եվրասիա մայրցամաքի այն ծայրը, ուր խաչակիրները փորձում էին դիմակայել արևելքից շարժվող նվաճողներին: Եվ հանկարծ Արևելքի և Արևմուտքի միջև այդ նոր սահմանին և գրեթե նույն այն ժամանակահատվածում, երբ սահմանն անցնում է այստեղով (XII – XIV դդ.), մինչև դեպի արևմուտք Ասիայի և Եվրոպայի միջև ներկայիս սահմանին ավելի մոտենալը, հայտնվում է Կիլիկիայի հայկական թագավորու-

¹ Այդպիսի վառ օրինակի մասին էթնոերաժշտության ոլորտից տե՛ս [5]:

թյունը, ընդ որում՝ հայերի էթնիկական տարածքի սահմաններից դուրս:

Ռուսաստանի և Արևելքի երկրների միջև հարաբերություններում Արևմուտք-Արևելք ուղղությունը համապատասխանում էր Հյուսիս-Հարավ ուղղությանը այն դեպքերում, երբ ճանապարհը դեպի Արևելք անցնում էր Կովկասյան լեռնաշղթայով (Հյուսիս /Արևմուտք/ – Հարավ /Արևելք/ բնական սահման): Եվ հենց այս սահմանին մենք գտնում ենք չերքեզահայերին, ովքեր այստեղ հայտնվել են միջին դարերում և ընդհուպ մինչև XXդ. սկիզբը առևտրային միջնորդի դեր են խաղացել «հյուսիսային» Արևմուտքի և «հարավային» Արևելքի միջև¹:

Մեկ այլ օրինակ է Ջուղա քաղաքի դրամատիկ պատմությունը: Քաղաքը XVIդ. հանգուցային առևտրական կենտրոն էր այն ժամանակվա Արևելքի և Արևմուտքի միջև: Երբ պարսից Շահ Աբաս արքան XVIIդ. սկզբին որոշեց Արևելքի և Արևմուտքի միջև սահմանը տեղակայել իր երկրում, նա պարզապես ավերեց Ջուղան և նրա բնակչությունը վերաբնակեցրեց Պարսկաստանում՝ հիմնելով Նոր Ջուղա քաղաքը, որը շուտով դարձավ նոր միջնորդ օղակ Արևելքի և Արևմուտքի միջև: Մոտավորապես երկու հարյուրամյակ անց, երբ այդ սահմանը տեղաշարժվեց դեպի արևելք՝ Հնդկաստանի կողմը, այս անգամ, սկզբում հոլանդական, ապա՝ բրիտանական Օստ-Ինդյան ընկերության ակտիվ գործունեության արդյունքում, բրիտանացիներն այստեղ գտան հայ վաճառականների, ովքեր արդեն ստեղծել էին հաջողությամբ գործող առևտրային ցանց հենց այս նոր սահմանում: Հայերը, որոնք վաճառականներ էին Նոր Ջուղայից, օգնեցին ընկերությանը առաջին քայլերն անել հնդկական շուկայում և բուֆերի դեր կատարեցին արևմտյան ու արևելյան վաճառականների միջև: Այս կարևոր միջնորդ դերի համար 1688թ. հայերին նույնիսկ շնորհվեցին Հնդկաստանում բրիտանական քաղաքացիների արտոնություններ, որոնցից, այնուամենայնիվ, նրանց շուտով զրկեցին (այն բանից հետո, երբ 1760-ական թթ. սկզբին հայերի մի մասն օժանդակեց բենգալյան նավաբ Միր Քասիմին (Քասիմ Ալի խան)՝ նրա բարձրացրած հակաբրիտանական ապստամբությունում)² [8, c. 70]:

Նման օրինակների թիվը հեշտությամբ կարելի է բազմապատկել: Դրանցից յուրաքանչյուրն, անշուշտ, ունի իր հատուկ պատմությունը, իսկ այդ պատմությունները տարափոխվում են բռնի վերաբնակեցումներից մինչև համարձակ առևտրային արշավանքները, ինչը հազիվ թե նպաստում է դրանց միավորմանը մեկ ընդհանուր մոդելի շրջանակներում: Սակայն որքան էլ տարբեր լինեին այդ տեղափոխությունները, դրանց արդյունքը լինում

¹ Չերքեզահայերի պատմության և էթնոմշակութային կերպարի մասին տե՛ս [6]: Հմմտ. Ուկրաինայի և Լեհաստանի հայերի համանման միջնորդ դերը. տե՛ս [7, c. 49, 61]:

² Միր Քասիմի ապստամբության և նրա լեգենդար գլխավոր հրամանատար, ծագումով հայ Գերգին խանի մասին տե՛ս [9, p. 383-418, 8, c. 50-71]:

էր նույնը. ուր էլ տեղաշարժվում էր Արևելքի և Արևմուտքի միջև շարժական սահմանը, Հայաստանը կամ հայերը ինչ-որ խորհրդավոր ձևով հայտնվում էին հենց այդտեղ՝ կարծես սպասելով սահմանի տեղաշարժմանը, որպեսզի միջնորդ դառնան նորովի սահմանազատված Արևելքի և Արևմուտքի միջև: Մովորաբար դա կատարվում է հակառակ նրանց կամքի. հայերը կարծես դատապարտված են միջնորդ դառնալ, բայց երբեմն այդ ընտրությունը ստանում է քաղաքական ռազմավարության ձև, ինչպես, օրինակ, Հայաստանը՝ Իրանի (Հարավի/Արևելքի) և Ռուսաստանի (Հյուսիսի/Արևմուտքի) միջև ներկայիս երկիմաստ միջնորդական դիրքորոշման պարագայում, ի դժգոհություն Արևմուտքի, հատկապես Միացյալ Նահանգների:

Առավել փոքր ծավալի շատ օրինակներ, որոնցում հայերը միջնորդի դեր են կատարում ըստ Արևելք-Արևմուտք հատկանիշի տեղական սահմանազատումներում, օրինակ՝ Կիպրոսում բրիտանացիների և թուրքերի միջև, ցույց են տալիս, որ մենք իսկապես գործ ունենք հայկական կենսակերպի ունիվերսալ մոդելի հետ: Վերջին օրինակը նույնպես վկայում է, որ այն ոչ միշտ է գոյատևման հաջող մոդել հանդիսանում: Կիպրոսում հայերը, որ ցեղասպանության ժամանակ փախել էին Թուրքիայից, սկզբում բնակություն հաստատեցին կղզու այն մասում, ուր ապրում էին տեղի թուրքերը (ահա թե ինչու հայերը միջնորդի դեր էին կատարում բրիտանացիների և թուրքերի միջև), բայց հունա-թուրքական հակամարտությունից հետո ստիպված էին վերաբնակվել կղզու հունական հատվածում [10, p. 50-51, 108, 119-122]: Բացի նշված մասնավոր մինի-մոդելից, ընդհանուր մոդելը նույնպես ցույց է տալիս, որ «երկուսի միջև լինելու» առանձնաշնորհն ունի իր զինը և որ մոդելն ունի երկու երես. «երկուսի միջև լինելու» վիճակը բազում փորձանքներ բերեց Հայաստանին և հայերին, քանի որ Արևմուտքն ու Արևելքը ոչ միայն համագործակցում են, այլև պատերազմում միմյանց հետ, իսկ նրանք, ովքեր գտնվում են նրանց մեջտեղում, դառնում են այդ պատերազմների անմիջական զոհերը: Արևելքի և Արևմուտքի միջև դիրք գրավելու այս մշտական «ձգտումը» այս կամ այն չափով վերաբերում է նաև հայ սփյուռքի կազմավորման գործընթացներին, ընդ որում՝ այդ գործընթացներում իրենց ավանդն են ներդնում «լինել երկուսի միջև» մեղալի երկու երեսները: Այսպես, 387թ. Հայաստանի բաժանումը Պարսկաստանի և Բյուզանդիայի միջև հանգեցրեց հայ սփյուռքի՝ արևմտյան, «բյուզանդական» հայերից ընձյուղված առաջին կազմավորումների, արևմուտքին ավելի մոտ հայտնվելուն: Նման խմբերի հիման վրա հետագայում, Արևելք-Արևմուտք սահմանին, կազմավորվեց Կիլիկյան թագավորությունը, որն, ի վերջո, ընկավ այդ նույն Արևելքի ու Արևմուտքի դիմակայության արդյունքում: Այսօր, երբ քարավաններն այլևս չեն անցնում Հայաստանով, հայերը փնտրում

են նոր մոդելներ, որոնք կհարմարվեին միջնորդ լինելու, «մեջտեղում ապրելու» հին սովորույթին, որպեսզի գոյատևեն արևմտյան և արևելյան ճանապարհների երբեմնի աշխույժ խաչմերուկների վրայով թռչող ինքնաթիռների ժամանակակից աշխարհում, հասկապես երբ Արևելքի և Արևմուտքի միջև սահմանը կարծես թե պատրաստվում է նոր տեղաշարժի:

Միաստիկ տրամաբանությունը, որ փորձեցինք նշել այս հոդվածում, մեզ տալիս է այն բանալին, լակնուսի թուղթը, որը կարող է օգնել կանխագուշակելու, թե այս անգամ ուր է տեղաշարժվելու Արևելքի և Արևմուտքի միջև քմահաճ սահմանը: Հարկ է ընդամենը փնտրել, թե աշխարհի քարտեզի որ մասում կան այսօր հայերի մեծ կուտակումներ: Ներկայումս նման վայր է Կալիֆորնիան: Ասիական ծագմամբ մարդկանց անընդհատ ավելացող քանակությունը, որը Կալիֆորնիան իբրև մշտական կամ ժամանակավոր բնակության վայր է ընտրում իր համար, մոտ ապագայում նման հնարավոր տեղաշարժի տեսողական «հավաստումն» է տալիս: Այն փաստը, որ սկսած 1980-ական թթ. ԱՄՆ-ը ավելի շատ առևտրական գործառնություններ է իրականացնում ոչ թե Ատլանտյան, այլ Խաղաղ օվկիանոսի միջոցով, նույնպես խոսում է մեր կանխատեսման օգտին¹ [11, p. 116]: Այնպես որ Հայաստանի և հայ սփյուռքի ոչ հասարակ, բայց ընդհանուր առմամբ կոմպլեմենտար փոխհարաբերությունները ապագայում կարող են պահանջել փոխհարաբերության նոր ռազմավարություններ հայ ժողովրդի երկու արևելյան և արևմտյան մասերի² միջև, պատրաստ լինելու համար Արևելքի և Արևմուտքի սահմանի նշմարվող հերթական տեղափոխմանը:

Հունվար, 2006թ.

Աղբյուրներ և գրականություն

1. *Рабинович Е.Г.*, Европа прогрия? // Имя: внутренняя структура, семантическая аура, контекст / Тезисы международной научной конференции, часть 1, М.: Институт славяноведения РАН, 2001, с. 59–61.
2. Европа // Большая Советская энциклопедия, 2-е издание, т.15, Москва: БСЭ, с. 382–427.
3. *Кухниадзе А.В.*, Кавказоцентристская концепция демократии // Научная мысль Кавказа, N 4, 1995, с. 66–72.

¹ Ա.Կուլիսիանիձեն խաղաղօվկիանոսյան այս կողմնորոշումն օգտագործում է Արևելք-Արևմուտք սկզբունքով աշխարհի նոր բաժանման վերաբերյալ կանխատեսումների համար, բայց նոր սահմանի տեղում տեսնում է Կովկասը, որը, նրա կարծիքով, կարող է միջնորդ դառնալ ապագա Եվրոպական և Խաղաղօվկիանոսյան կենտրոնների միջև: Տե՛ս [3, с. 67-68]:

² Արևելյան/Արևմտյան Հայաստանից մինչև հայրենիք/սփյուռք հայ ժողովրդի հաստատուն երկճյուղման մասին տե՛ս [12]: Որոշ փոփոխություններով արտատպվել է «Диаспоры» (2005, № 3, с. 170-194) և «21-й ВЕК» (2005, № 2, с. 137-155) հանդեսներում:

4. *Աբրահամյան Լևոն, Գուլյան Արա, Մարության Հարություն, Շազոյան Գայանե, Պետրոսյան Համլետ*, Հայկական շուկայի ազգագրություն. Մի քանի հարցադրում, Արդի էթնամշակութային գործընթացները Հայաստանում, 1, Հանրապետական գիտական նստաշրջան, Զեկուցումների հիմնադրույթներ, Եր., ՀՀ ԳԱԱ ՀԱԻ, 1997, էջ 5-6:
5. *Abrahamian L.H., Pikichian R.V.*, Observations on the Ethnography of a Modern City: The Example of Erevan. 1. The *Rabiz* and the Variability of the Urban Social Hierarchy // *Soviet Anthropology & Archeology*, Fall 1990, Vol. 23, N 2, p. 34–44.
6. *Արաքելյան Գ.*, Черкесогаи // *Кавказ и Византия*, N. 4, с. 28–129.
7. *Григорян В.П.*, История армянских колоний Украины и Польши (армяне в Подолии), Ереван: Изд. АН Арм. ССР, 1980.
8. *Абрамян Р.А.*, Армянские источники VIII в. об Индии, Ереван: Изд. АН Арм. ССР, 1968.
9. *Seth M.J.*, Armenians in India, New Delhi, Bombay, Calcutta: Oxford & IBH Publishing Co., 1983.
10. *Pattie S.P.*, Faith in History: Armenians Rebuilding Community, Washington and London: Smithsonian Institution Press, 1997.
11. *Hague P., Harrop M., Breslin Sh.*, Comparative Government and Politics. An Introduction, London: Macmillan, 1992.
12. *Абрамян Л.*, Армения и армянская диаспора: расхождение и встреча // *Диаспоры*, 2000, N 1–2, с. 52–76.

АРМЕНИЯ И АРМЯНЕ МЕЖДУ ВОСТОКОМ И ЗАПАДОМ

Левон Абрамян

Резюме

В статье проясняется странное совпадение, точнее закономерность: кажется, армяне всегда оказываются на стыке Востока и Запада, каким бы метаморфозам не подвергалась эта граница в течение истории. Этот феномен очевиден на примерах армянского Киликийского царства, кавказских черкесогаев или же армянства Индии и Новой Джуги в Персии.

«Тенденция» постоянного присутствия между Востоком и Западом относится и к процессам формирования диаспоры и должна использоваться в разработках новых стратегических планов сосуществования, особенно в свете вероятности новой метаморфозы границы Восток – Запад, которая, возможно, пройдет по регионам, где уже обосновались армяне, как бы «предвидя» эти изменения.